

Oc se amal hual in lanahuatini Pablo quinmijcuiluilic laneltocanjmes hual yulinijme pin caltilan Corinto

Pablo quinmijcuiluilía (quinmescibiruilía) yehuanten hual quineltocalo Cristo pin caltilan Corinto

1 Nehual Pablo niunca Cristo Jesús ilanahuatini pampa yoje Dios quinequic pa niyes ilanahuatini. Huan tocní Timoteo ticatē. Annimitzjicuiluilijtica amhuanten hual anmonechicúa pa anquimolancuacuetzilis Dios pampa anquineltoqa yihual nepa pin caltilan Corinto. Noje annimitzjicuiluilijtica moxtin ilacames Dios hual cate nepa noje pa mochi in lali Acaya. ²Ma Dios toTajtzin huan toTata Jesucristo anmijchihuilican cuali huan anmitzmacacan mosehuilislí pa anmoyolo.

Pablo quinmilía quinami Dios quinlacahualtía yehuanten hual icnotilo huan panulo lacocoltilislí

³Ma quijtucan moxtin lajtomes niman cuali pa Dios hual unca iTajtzin toTata Jesucristo. Yihual toTajtzin hual quimati laicnilía, huan yihual in Dios hual quimati techmaca mochi lajtol hual tejchicahualtía pa toyolo huan techlacahualtía. ⁴Dios techlacahualtía, mocajtica tonahuac

pa techmacas chicahualislí pa mochi tonalijmes quiman tipanujticate lacocoltilislí. Inon tejchihuilía pa yoje huil ticmatisi ticmacasi chicahualislí oc sequin mochi tonalijmes quiman yehuanten panujticate lacocoltilislí. Tiqinmacalo in chicahualislí calica Dios tejchicahualtía tehuanten noje quiman techmaca chicahualislí. ⁵Inon unca yoje pampa jan quinami tipanujticate mías lacocoltilislí pa Cristo, yoje quinami yihual panuc lacocoltilislí, cuaquín jan yoje yihual mocahua tonahuac pa ticanasi mías ichicahualislí hual quinequi techmaca. ⁶Sinda lacames techcocoltilo, yoje unca pa amhuanten ancanas chicahualislí pa ancayas lachicahualtili huan pa ancayas laquixtili pa ipolehuilislí anmolajlaculislí pa anmoyolo. Huan sinda tehuanten timochicahualtilo pa camo ticayasi majquimes, cuaquín unca pa yoje amhuanten anmochicahualtis pa camo ancayas majquimes. Huan anmochicahualtis pa camo ancayas majquimes sinda amo anmocahua pa anmoepenialtis in lacocoltilislí quinami techpanúa tehuanten. ⁷Amo timocahualo pa ticchiasi in cuali, huan amo unca nindeno hual tejtzacuilía pa camo ticchiasi. Quema, neli mocahua chicahuac inon hual ticchialo pa

amhuanten. Ticmatilo pa toyolo pampa anmocahuas anquineltocatica, mas que anmitzpanus míac hual anmitzcocúa. Inon ticmatilo pampa quinami anpanúa in lacocoltlisli jan quinami tehuanten, noje anmochicahualtía pa camo ancayas majquimes. Huan amo ancayas majquimes pampa Dios techpalehuía pa timopepenialtisi ca ichicahualisli.

⁸Tiquijtulo yoje, nocnían, pampa ticnequilo pa anquimatis quinami míac tipanuje lacocoltlisli nepa pin lalticpan Asia. Quema, yoje míac tipanujtataloaya latojlocalisli, amo huil timopepenialtaloaya huan timocahuaje pa ticchiasi pa huil tiquisalosquiaya pa camo timiquilosquiaya. ⁹Quema, tiquijtuloaya pampa neli yehuanten molalilije pa techmictilosquiaya. Ma yoje, inon techpanuc pa yoje amo ticlaililosquiaya laneltocalisli ca tehuanten tochicahualisli. Techpanuc pa ticlaililosquiaya laneltocalisli ca Dios hual quinyuliltía oc sejpa yehuanten hual miquije. ¹⁰Yoje techquixtic pin miqulilisi hual yoje míac ticmacajsije. Huan techquixtis oc sejpa. Ca yihual timolalije pa ticchiasi pa yihual techquixtilis pin miqulilisi oc sejpa.

¹¹Amhuanten noje anquipía pa antechpalehuis pan ipampa quinami anquilajlanía Dios pa tehuanten. Yojqe, míac hual cate tocnían quisehuesi Dios pa tehuanten. Yes pampa Dios tejchihuilía cuali. Tejchihuilía cuali pampa míac hual cate ilacames quilajlanije pa tejchihuilisquiaya yoje.

Pablo quinmilía leca amo uyac pa Corinto

¹²Ticnequilo pa anquilajlanis Dios pa tehuanten, pampa tiquijtulo ca niman míac paquilisli pampa tiyulije ticchihuilijtataloaya len cana cuali inminlaixpan yehuanten pin lalticpan huan neli anmolaixpan amhuanten. Tiyulije niman chipahuac

anmoyampa huan amo tiyulije tilacuajcuamantataloaya. Yoje tiyulije pan ipampa quinami Dios mojmosta techpalehuía, huan amo pan ipampa in lajmatilisli hual quipialo yehuanten pin lalticpan hual amo quiximatilo Dios. Huan tolajmatilisli hual technextilía len unca cuali huan len unca amo cuali techmachiltía neli pampa tiquijtuticate len melahuac. ¹³⁻¹⁴Amo tilacuajcuamanticate quiman antimitzijcuiluililo (antimitzescribiruililo), pampa antimitzijcuiluililo mochi ca lajtol hual amhuanten huil anmomaxtía huan huil anquimati len quinequi quijtúa. Axan anquimati nadita pampa huil antechpilía míac paquilisli quinami tehuanten antimitzpililo míac paquilisli. Huan pa in tonali quiman hualas oc sejpa in Tata Jesús, nicchixtica niquita pampa neli anajsic anquimatic pampa huil antechpilis míac paquilisli pan topampa tehuanten, jan quinami pan anmopampa antimitzpililo paquilisli.

¹⁵Quinami niquijtuaya neli pa noyolo pampa cataya yoje, nicnequiaya nicpehualti nopaxalulisli nihualajtica ca amhuanten pa yojqe annimitzpalehuisquiaya sejpa huan oc sejpa. ¹⁶Nicnequiaya annimitzpaxaluili quiman niajtiahuiaya pa Macedonia. Huan nicnequiaya annimitzpaxaluili quiman nimocuepaya niquistataya pa Macedonia pa anechpalehuisquiaya pa nicanasquiaya ojli pa in lalticpan Judea. Ma yoje, amo nicchihuaya yoje. ¹⁷Huan ¿anquijtúa pampa yoje nicnequiaya nicchía? ¿Anquijtúa pampa niunca se hual yuli lachijtica quinami niquijtuaya da amo monotza nindeno len yes? ¿Anquijtúa nehual niquita nicchía mochi quinami se lalac hual yuli quinami quinequilo yehuanten pin lalticpan pa yulis se? ¿Anquijtúa niunca se lalac hual quijtúa “quema” huan “amo” in ome

lajtomes jan inminahuac quiman nilananquilfa, quinami antimitzililoaya pampa tihualasi huan cuaquinon amo ticchihualo in hual antimitzilije? No, tehuanten amo quinami inon.

¹⁸Neli huil ticneltocalo len quijtúa Dios. Huan jan yoje neli unca pampa inon hual antimitzililo amo quinequi quijtúa “quema” huan “amo” in omenten lajtomes. ¹⁹Tehuanten Silvano huan Timoteo huan nehual antimitzlamachilito quinami Dios iXolol Jesucristo amo quijtúa “quema” huan “amo” pan se lajtulisli. No, pampa ca yihual huil tiquijtulo “quema” pa mochi hual quijtúa, pampa ticmatilo neli unca. ²⁰Yoje, mochi hual Dios quilfa neli pampa tejchihuilis, inon tejchihuilis pan ipampa Jesucristo. Pan ipampa yihual, ticmatilo Dios techilijtica “quema” ca len yes techilfa. Pampa inon, tiquijtulo “Yoje ma ye” pan ipampa Cristo, pa yoje Dios quincacuis mfac lajtomes huejué hual moxtin yalo quililo. ²¹Huan unca Dios hual tejchihuilfa tehuanten huan amhuanten pa tiyultiasi tictocaticate Cristo pa iojli, amo timijcanticate capa yihual. Huan Dios techlajultic pa tictequipanuilisi. ²²Yihual quilalic topan quinami ilayapalisli ca temulol hual amo moita. Quilalic topan pa momatis pampa ticate iyaxca huan pa tejtzacuilis pa camo tiquitasi polehuilisli. Quimacac iEspíritu Santo laijtic pa toyolo pa yoje ticmatisi pampa tialo ticpialo mochi hual quinequi techmaca.

²³Axcan, pampa Dios quimati in hual niqijtúa pa noyolo, nicnotza yihual pa anmitznextilis pampa unca neli inon hual nfa annimitzila: Nimotzacuilic mochi innojen tonalijmes pa camo nihualasquiaya pa Corinto, pampa amo nicnequiaya nicajua amaqui.

²⁴Amo unca pa tehuanten antimitzilisi chicahuac inon hual anquipfa pa

anquineltoacas pa yoje anyulis anquineltoacatica Cristo chicahuac. No, titequipanulo ca amhuanten pa anquipfas paquilisli anquichijtica quinami Dios quinequi. Sinda anyuli anquineltoacatica chicahuac Dios ilajtol, cuaquin yoje amo quiman anmoxilus pa anquicahuas Dios iojli.

2 Ma yoje, nimolalic pa camo annimitzpaxaluilis oc sejpa sinda yahuiaya techcocu toyolo nehual huan amhuanten. ²Yojque nicchfac pampa sinda annimitzcocuhuilfa anmoyolo, cuaquin amo cayas amaqui hual nechpaquiltis sinda quincocujtica inminyolo yehuanten hual niquincocuhuilic inminyolo. ³Huan annimitzizcuiluilic ca lajtomes chijchicahuac pa yoje, quiman niajsiaya ca amhuanten, amo nechcocusquiaya noyolo. Unca pampa amhuanten anquipfa pa annehmacas paquilisli. Niqijtuaya neli pa noyolo pampa quiman nihualaya, neli amhuanten anmoxtin anquipiasquiaya paquilisli jan quinami nehual. ⁴Annimitzizcuiluilic (annimitzscribiruilic) quiman nechcocujtataya chicahuac noyolo, huan nichocatataya. Ma yoje, amo annimitzizcuiluilic inon pampa nicnequiaya pa anmitzcocus anmoyolo. Cataya pa annimitzmachiltisquiaya quinami mfac annimitzlasojla.

Pablo quinmilfa pa quipujpuhuasi in se hual quichfac in laijlaculisli

⁵Huan sinda unca se hual quincocuc inminyolo pampa quichfac in laijlaculisli, cuaquinon amo unca nehual nohuán nejchihuilic. Nadita annijchihuilic anmoxtin noje. Niqijtúa “nadita” pa yoje amo nesis quinami nilajcuilujtica chicahuac ca cualanilisli. ⁶Pa in se niqijtúa “jan ca inon san” ca in la'ajualisli hual anquichihuilic in mfac capa amhuanten.

⁷Axcan, yes cuali pa anmocuepas pa anquipupjúas huan pa anquilacahualtis. Sinda amo, cuaquín cuajnesi yihual moitas lasulahuali ca míac lacocolisli pa iyolo. ⁸Yoje, annimitztemachía xicnextilican oc sejpa quinami anquilasoja. ⁹Huan yoje, cataya pampa inon noje annimitzjiculilic, pa yoje nicmatis huan pa annimijchihualtis se lanextilislí pa momatis sinda anquineltocha Cristo ca mochi hual anquichía. ¹⁰Huan aqui yes anquipupjúa, cuaquín nehual noje nicpupjúa pampa nicmati anquichíac cuali. Huan sinda unca len hual monequi pa nicpupjúas, cuaquinon inon hual nicpupjúa unca pa anmijchihuilis cuali ilaixpan Cristo. ¹¹Yoje Satanás amo techquitzquis sejpa pa huil tejsulahuas. Ticmatilo cuali quinami yihual quitemujtía quinami huil tejchihuilis amo cuali.

Pablo quijtúa quinami amo quipiaya mosehuilislí pa iyolo nepa pin caltilan Troas

¹²In tonali quiman niajsic pa in caltilan Troas pa niclamachiltisquiaya ilamachiltislí cuali Cristo, nicmatiaya quinami toTata nejchihuilic tonali jmes cuajcuali pa niquinlaquetzilisquiaya yehuanten nepa pa quimatisquiaya Dios ilajtol. ¹³Ma yoje, amo nicpiaya mosehuilislí pa noyolo pampa amo niqitaya nepa tocní Tito. Pampín nimoxiluc, niquincahuac tocnían huan míac pa in lali Macedonia.

Ticsulahualo móchi pan ipampa Cristo

¹⁴Huan ma nicsehui Dios hual mojmosta unca quinami yihual techlaicana quinami se guache quinlaicana oc sequin guaches pa se latocalislí sinda quinsulahuaje yehuanten hual moanaloya ca yehuanten. Quema, Dios techlasulahualtilí

yehuanten hual moanaloya ca yehuanten, techlasulahualtilí pan ipampa Cristo. Huan pan topampa yehuanten, Dios quisemana ilamachiltislí Cristo pa mochi caltilan cajcapa yesi. Unca quinami len hualajuíac mosemana cajcapa. ¹⁵Quema, unca pampa yehuanten ticate quinami len hual iyaxca Cristo hualajuíac. Yojque Dios quijtúa pampa ticate yehuanten. Quijtúa pampa ticate quinamiajuíalislí capa cate yehuanten hual Dios quinquixtitica pa ipolehuilislí inminlajlaculislí. Huan ticateajuíalislí capa cate yehuanten hual mopolujticate huan amo quiman moitasi oc sejpa pampa amo canaloyojli Cristo. ¹⁶Huan in hualquinamiajuíac, unca in lamachiltislí cuali hual ticlamachiltinemilo. Quinnextilí yehuanten hual mopolejticate len hual quinmijnamiquiltía miquilislí san. Huan pampa yultiasi amo quineltocaticate, yoje lamisi miquisi huan yajmo moitasi capa unca Dios. Huan yehuanten hual canaloyojli in lamachiltislí cuali, pan ipampa in lamachiltislí cuali, quimatilo pampa quiपालoyulilislí huan amo mocahuasi pa yulisi. Huan ¿aquí huil quipía chichahualislí pa quinchías innojen pan ipampa ichichahualislí yihual ihuían? Amaquí huil. ¹⁷Ma yoje, pan ipampa ichichahualislí Dios yehuanten huil ticchihualo. Amo ticate lacames hual quilamachiltilo Dios ilajtol pa ticanasi tomin. Quema, cate sequin hual quichihualo yoje. Ma yoje, yehuanten tilacames hual tiquijtulo ilajtol Dios. Huan moxtin huil quimatilo pampa tiquijtulo melahuac, pampa tiquijtulo quinami ticataloaya iyampa Dios hual techtilanic pa tiyesi itequipanujquimes pan ipampa Cristo.

Pablo quinmilía len quinequi quijtúa Dios ilajtulislí yancuic

3 Axan, ¿anquijtúa tipejticate tilajtulo hué tonahuac yehuanten

tohuían oc sejpa? Huan pampa inon hual nilamic niqijituc, ¿anquijtúa monequi pa ticpiasi amames hual oc sequin quinmijcuiluje pa lajtulosquiaya hué tonahuac tehuanten, quinami monequi pa quipiasi oc sequin? ¿Anquijtúa monequi pa amhuanten anquinmijcuilus amames hual lajtulo hué tonahuac tehuanten huan pan impampa in amames ticpialosquiaya lahueliltilisli? ²Damo ticnequilo nindeno quinami inon. Amhuanten nojen anuncia quinami amal hual lajtúa hué tonahuac tehuanten quinami neli ticate Dios ilanahuatinijmes hual yihual quintilanic. Unca quinami in amal unca lajcuiluli pan toyolo. Huan yoje, moxtin huil quimatilo pampa amhuanten anlajtúa hué tonahuac tehuanten, pampa unca quinami yehuanten momaxtificate inon hual unca quinami lajcuiluli pani anmoyolo. ³Quema, yoje anquinnextilía moxtin pampa anuncia quinami se amal hual Cristo anmitzjicuilulic huan tehuanten antimitzhualiquilije. Huan in hual unca quinami cataya amal, amo unca quinami cataya lajcuiluli ca tinta. Inon quijcuiluc iEspíritu Santo Dios, yihual in Dios hual yuli. Amo cataya lajcuiluli pan tixcalimes aj'alastic. Cataya lajcuiluli pan inminyolo lacames, inminyolo yajyamanquil. In quinequi quijtúa anquipía ilajtol Cristo pa anmoyolo pampa anyuli anquichijtica quinami ilajtol quijtúa.

⁴Joyque, ilaixpan Dios ticmatilo pa toyolo pampa huil tiquijtulo neli pampa ticate Dios ilanahuatinijmes. Unca Cristo hual techmachiltic inon pa toyolo. ⁵Amo tiquijtuticate pampa huil ticchihualo len pan topampa tehuanten, pa joyque tiquijtulosquiaya pampa len tolahueliltilisli tehuanten quisa pa tehuanten tohuían. Tehuanten tolahueliltilisli quisa pa Dios hual unca ca tehuanten. ⁶Unca yihual

hual techueliltic pa tictequipanuilisi ticlamachiltificate ilajtulisli yancuic. Huan in lajtulisli yancuic amo unca mías lajtomes lajcuiluli hual ticpialo pa ticneltocasi. In lajtulisli yancuic ticmatilo pan ipampa quinami technextilía in Espíritu Santo. Ilajtulisli in mías lajtomes lajcuiluli amo huil ticneltocalo huan pampín techtilanisi pa timiquisi. Quema, in lajtulisli lamictía. Huan in Espíritu Santo hual quinextilía se in lajtulisli yancuic, yihual layuliltía.

⁷Axan, in lajtulisli lajcuiluli pan tixcali, in lajtulisli hual lamictía, Dios quinmijcuilulic totajtzitzían ca mías laixpelalisli cualtichin hual moita san capa unca in Dios hual unca mochi cuali. Huan pampa inon, iixco Moisés noje laixpelaya chicahuac. Yoje yehuanten in israelitos totajtzitzían momajtije quitaje iixco Moisés laixpelatataya chicahuac, mas que lantiahuiaya in laixpelalisli. ⁸Huan sinda cataya joyque ca in lajtulisli calica Dios pehuac monexitic ca ilacames, cuaquín ¿amo cayasquiaya lalalili ca niman mías laixpelalisli chicahuac in lajtulisli hual in Espíritu Santo technextilía? ⁹Quema, cayasquiaya joyque. Sinda cataya laixpelalisli cualtichin quiman quinlalilije in lajtulisli hual techtilanía pa timiquisi, cuaquion cayasquiaya niman mías laixpelalisli cualtichin huan hué quiman in Espíritu Santo quilalic in lajtulisli calica Dios quinchipahuilía inminyolo lacames. Yoje quinquixtilía inminlajlaculisli pa Dios toTajtzin quinmitas quinami lacames amo quipixticate laijlaculisli. ¹⁰Inon tiquijtulo neli, pampa in lajtol hual Dios quinmilic totajtzitzían hual quipiani laixpelalisli cualtichin axan amo quipía laixpelalisli cualtichin nindeno sinda tiquitalosquiaya inahuac inon hual Dios techualiquilic ca niman

míac laixpelalisli cualtichin. ¹¹In lajtol hual Dios quinlalilic hualac ca yehuanten pa yina ca lanextilisli chicahuac. Axan yajmo moita yojque pampa unca quinami len hual pilinía. Yoje, inon hual Dios techlalilic hual amo lamis huejcahuas, neli quipías niman míac chicahualisli hué.

¹²Yoje, amo timomajtilo se naditita pampa ticchixticate pa ticanasi in chicahualisli hual unca niman hué huan amo lamis huejcahuas. ¹³Huan pampa amo timomajtilo se nadita, amo ticate quinami Moisés hual quitzacuac iixco ca se dango pa yojque amo quitalosquiaya in israelitos quinami lantiahuiaya in laixpelalisli pa Moisés iixco. ¹⁴Huan yehuanten ilacames Israel amo mopatilije quinami laijnamiqulo, pampa quinami len hual unca chicahuac, jan yoje mocahualo yehuanten ilacames Israel quiman laijnamiqulo. Amo huil mopalalo, mochihuaje pachacal pa inminyolo. Pampa inon, yehuanten hual yulinijme pa yina huan yehuanten hual yulilo axan amo quimatilo len quinequi quijtúa quiman momaxtilo ilajtulisli in lajtol calica Dios pehuac monextic ca ilacames. Unca quinami se tzotzomajli mocahua quintzacuilijtica inminlajnamiquilisli calica quimatilosquiaya len quinequi quijtúa in lajtol. Jan pan ipampa Cristo san huil quimatisi len quinequi quijtúa. ¹⁵Quema, pa yina huan axan, quiman yes momaxtilo iamal Moisés, unca quinami se tzotzomajli quintzacuilijtica pa camo quitasi pa quimatisi len quinequi quijtúa. ¹⁶Ma yoje, sinda se lalac motemaca pa yes se ca Dios ilacames, cuaquín unca quinami in tzotzomajli cataya laijcuanili. ¹⁷Axan, in Tata, yihual in Espíritu hual quinmijcuanilía inon hual quintzacuilía pa camo quimatisi len quinequi quijtúa. Huan capa cayas

iEspíritu Santo in Tata, nepa lacames cate lamacahuali pa camo quipias pa panusi in lacocoltilisli hual panusi sinda amo quineltocalo in lajtol. Cate lamacahuali pa yajmo quinlachihualtía inminlajlaculisli. ¹⁸Huan timoxtin tiquizticate ilaixpelalisli cualtichin in Tata, amo ticpixticate quinami in tzotzomajli tejtzacuilijtica toixco. Huan ticate timopalaticate pa timochihuasi quinami in Tata Jesús. Se tonali ticanasi nadita ilaixpelalisli cualtichin, oc se tonali ticanasi oc se nadita. Yoje, se tonali huan oc se tonali ticantiasi pa ticayasi se tonali quinami yihual, pampa in lapatilisli cualtichin quisa pa in Tata pan ipampa iEspíritu.

4 Yoje, amo timomajtilo. Unca pampa ticpialo in tequipanulisli pa Dios pan ipampa ilaicnililisli. ²Amo ticchihualo pinahualisli hual quichihualo lacames quinmolatilijticate oc sequin. Amo ticchihualo lacuajcuamanalisli pa tiquisasi cuali ca len yes ticchijticate. Huan amo tilamaxtilo ca inminlamaxtilisli lacames quinami cataya ilajtol Dios. Amo ticmaxtilo quinami amo quijtúa ilajtol Dios. Quema, tiquijtulo melahuac inminlaixpan moxtin ca lajtol hual huil quimatilo len quinequi quijtúa. Huan pan ipampa inon timonextililo ca moxtin quinami ticate lacames mejmelahuac. Huan yehuanten nechitalo yoje pampa inminlajmatilisli pa inminyolo quinnextilía len unca cuali huan amo cuali. Noje Dios techita yoje. ³Huan mas que cuajnesi tolamachitilisli cuali amo huil quimatilo len quinequi quijtúa, san cate yehuanten hual amo cate pan iojli Cristo hual amo huil quimatilo. Yehuanten yajtialo micticate, amo moquixtificate pa in polehuilisli. ⁴Yehuanten cate quinami pachacames pampa laijnamiqulo yoje, amo laneltocalo. Quinchihuilic

vojque Satanás, yihual in dios hual quitequipanuililo yehuanten hual amo quiximatilo toDios. Satanás quinchihuilic pa vojque quintzacuilis pa camo quitasi pa inminyolo ilahuilisi ilamachiltisli cuali Cristo. In lamachiltisli unca hué huan cualtichin. Huan Cristo unca san mochi quinami Dios. Ma yoje, amo huil quimatilo inon pa inminyolo. ⁵Tehuanten amo tilacuajcuamanalo quiman tiquinlaquetzililo ilajtol Dios, pampa amo tiquinlaquetzilijtcate tonahuac tehuanten. Tiquinlamachiltiticate inahuac Jesucristo huan quinami yihual unca in Tata hual quipía lahueliltisli pan moxtin. Huan tehuanten antimitzililo pampa ticate anmotequipanujquimes pampa yoje quinequi Jesús. ⁶Yoje ticate pampa cataya Dios hual quijituc: “Ma lahui capa laticumac”, huan yihual Dios lahuic pa laijtuc toyolo pa techmacas tehuanten ilajmatilisi ichicahualisli cualtichin hual tiquitalo quiman tiquiztcate Cristo. Unca quinami lahuilisi pa toyolo.

Tiyulilo ticlalihticate tolaneltocalisli ca Cristo

⁷Huan ticpialo ilahuilisi ilajmatilisi Dios. Tiquitalo quinami ipati niman míac. Amo yoje míac ipatilo mochi pin lalticpan quinami ipati inon. Huan ticpialo in lahuilisi pa laijtuc tocueros hual cate lachihuali ca in lali. Ca inon ticnextilo quinami in chicahualisli niman hué quisa capa Dios huan amo quisa capa tehuanten. ⁸Ca mochi lachihualisli quinami huil, tolacocolinijmes tejchihuillilo amo cuali. Ma yoje, amo huil tejtzacuililo pa camo huil tiquisasi pa capa timoitalo pin amo cuali, pa camo tiasi ticchijtcate totequipanulisli. Huan mas que pan míac tonalijmes amo huil tilajnamiquilo ca mosehuilisi pa

ticmatisi len ticpialo pa ticchihuasi, ma yoje, amo quiman timoitalo lasulahuali. ⁹Techtojtocalo pa techmictisi, huan Dios amo techcajcahua. Sinda tejsulahualo, Dios amo quinmacahuiltía pa techmictisi. ¹⁰Mojmosta timoitalo capa quinequilo techmictilo quinami quimictije Jesús. Inon techpanúa pa yoje moitas noje pa tocueros iyulilisi Jesús hual tejtzacuilía pa camo timiquisi. ¹¹Unca pampa mochi in tonalijmes quiman tiyulticate, amo mocahualo pa techtemacasi pa techmictisi pampa ticneltoalo Jesús, pa yoje monextilis ilayuliltisli Jesús pa innojen tocueros (tonacayo) hual huil miquilo. ¹²Yoje, timoitalo mojmota capa huil timiquisi. Ma yoje, amhuanten anquiztía iyulilisi Jesús anmitzyuliltitica.

¹³Ticpialo in se Espíritu hual techpalehuía pa ticlalisli tolaneltocalisli ca Jesús. Ticpialo in se Espíritu, jan quinami quijcuiluc se pan ipampa in Espíritu, quijcuiluc, quil: “Nicalic nolaneltocalisli ca in, huan pampa inon nilajtuc.” Huan pampín tehuanten noje ticlalije tolaneltocalisli ca ilajtol Dios. Huan yoje ticneltoalo huan tilajtulo. ¹⁴Dios quiyuliltic in Tata Jesús quiman cataya mictataya capa cate in mijquimes. Huan pampín ticneltoalo pampa noje techyuliltis pa ticayasi ca yihual. Huan techuicas noje ca amhuanten ca capic ticayasi ca yihual. ¹⁵Mochi inon panuc pa yoje anmitzpanus len cuali amhuanten. Huan yoje, quiman ajsis in cuali ca míac huan oc sequin míac lacames hual Dios quinchihuilía, cuaquín yehuanten quisehuisi Dios míac. Yihual yoje quincequis míac lajtomes huejué hual yehuanten quilisi.

¹⁶Pampín amo timomajtilo. Mas que tocueros quinectialo lamilo pa miquisi, ma yoje toyulilisi pa laijtuc tehuanten mochía yancuic mojmota.

¹⁷In lacocoltlisli hual tipanulo amo unca m'íac sinda tiquiztialo inahuac in m'íac laixpelalisli cualtichin hual amo lamis huejcahuas. In laixpelalisli cualtichin Dios quichijchijtica pa techmacas. Quema, amo tiqitalo nindeno pan lalticpan hual huil tiqijitulo pampa unca jan quinami in laixpelalisli cualtichin. ¹⁸Inon unca pampa tiquizticate innojen hual amo moitas nican pan lalticpan. Amo ticmacalo toxco ca innojen hual moitalo. Innojen hual moitalo yajmo huejcahuasi quiman lamis in lalticpan. Ma yoje, innojen cuajcualtichin hual amo moitalo amo quiman lamisi huejcahuasi.

5 Ticmatilo pampa in cuerpo (tonacayo) capa tiyulilo unca lachihuali ca lali, huan quinami se cali amo huejcahua, yoje amo huejcahua in cuerpo. Ma yoje, sinda in cuerpo xitinis, cuaquin ticpialo capa tichantisi. Unca se cali hual Dios quich'íac, amo quich'íac lacames. Unca pin cielo huan amo quiman lamis. ²Nican neli tisiahuilo huan ticnequilosquiaya m'íac timolaquentilo ca tocuero hual unca pin cielo pa tichantilosquiaya pin tocuero hual unca iyaxca in cielo. ³Inon ticnequilo, pa yoje, sinda timolaquentilo ca inon, cuaquinon amo timoitasi nacatil, quinequi quijtúa, toyolo amo moitas amo quipixtica icuerpo pa quipachus. ⁴Neli unca inon pampa mochi in xixihuimes quiman tichantiticate pin cali hual unca tocuero, titenalo huan timoitalo lacocoltili. Amo unca pampa ticnequilo timiquilo pa yoje yajmo techcocolt'ía tocuero hual mojmosta oc se nadita mochijtica quinami lantica. Ticnequilo quinami timolaquentilo ca tocuero yancuic hual Dios yahui techmaca. In ticnequilo pa yojque yajmo nesis in tocuero tehuanten hual yahui miqúi. Huan yajmo nesis, pampa in yulilislí

yancuic cayas capa catani in yulilislí calica tipehuaje, in yulilislí hual amo huejcahuas. ⁵Huan Dios, unca yihual hual jan yoje tejchijchihuilic pa huil ticpiasi mochi inon. Techmacac in Esp'írítu Santo pa techmachiltis neli pampa tialo ticpialo inon.

⁶Yoje, amo timocahualo pa ticmatisi inon pa toyolo pampa pa mochi tonalijmes hual tiyulilo ca in tocuero, timocahualo pa quiahuac tocali, nicnequi niqijtúa, ayamo ticate ca in Tata. ⁷Huan tiyultialo nican pan lalticpan pan ipampa quinami ticneltoalo Dios ilajtol. Amo tiyultialo san ticneltoacicate len tiqitalo.

⁸Tiqijitulo neli pa toyolo huan ticnequilosquiaya pa yajmo tiyulisi pa tocuero hual axan ticpialo, pa yoje huil tiyultiasi capa unca in Tata, pa yoje tichantisi ca yihual. ⁹Pampa inon timotolinilo pa tiyulisi ticpaquiltiticate in Tata, ma caya quiman ticate pa laijtic tocuero huan pa quiahuac tocuero. ¹⁰Yoje ticchihualo pampa timoxtin ticpiasi pa tinesisi iyampa Cristo quiman molalis pa technextilis sinda totequipanulislí pa yihual quimonotziliaya. Monequi pa yihual technextilis inon pa yoje mochi sejse ca tehuanten ticanasi in hual cayas toyaxca sinda unca cuali, o sinda amo unca cuali. Ticanasi pampa inon hual mochi sejse ca tehuanten ticchihuaje quiman tiyuliloaya pa tocuero nican pan lalticpan.

Dios ilajtol techmaca mosehuilislí pa toyolo

¹¹Yoje, pampa tiquiximatilo in Tata hual monequi pa timomajtisi ilaixpan yihual, timotolinilo pa tiqinyonlalisi lacames pa quilalisi inminlaneltoalislí ca yihual. Dios quimati quinami ticate pa toyolo. Huan neli pa toyolo tiqijitulo ticchixticate pampa amhuanten noje anquimati da ticate lacames

mejmela huac. Anquimati inon pan ipampa ilajmatilisli anmoyolo. ¹²Amo antimitzilijtcate oc sejpa quinami cuali tiyulilo pa yoje anquijtus len cuali pa anmoyolo inahuac quinami tiyulilo. No, antimitzmacaticate quinami huil anquinlaquetzilis hué tonahuac tehuanten ca oc sequin, pa yoje huil anquinnanquilis yehuanten hual lajtulo hué pa inminyolo san inahuac quinami nesilo oc sequin. Nicnequi niqijtúa, lajtulo hué inahuac quinami quinmitalo oc sequin ca inmixtololojmes huan amo inahuac quinami nesilo pa inminyolo. ¹³Ma annimitznextili len nicnequi niqijtúa. Tehuanten, sinda tinesilo ca amhuanten quinami yehuanten hual amo lajnamiquilo cuali, cuaquín unca pa Dios san. Huan sinda tilajtulo huan tilachihualo quinami yehuanten hual quimatilo in hual laquetzalo, cuaquín unca pa antimijchihuilisli cuali amhuanten. ¹⁴Inon unca pampa Cristo tejchihualtía pan ipampa ilasojlalisli hual quilalic pa toyolo. Yoje ticmatilo neli pampa sinda se miquic pa laxlahuis pa inminyulilisli moxtin, cuaquín Dios quita inon quinami moxtin miquije. ¹⁵Huan Cristo miquic pa moxtin, pa yoje yehuanten hual yulticate yajmo yulisi pa mopaquiltisi yehuanten inminhuán. Axan, quinequi pa yulisi quipaquiltiticate yihual hual miquic huan yulic oc sejpa pa quinchihuilisli cuali yehuanten.

¹⁶Axan huan pa quiman, yajmo tiquitalo amaqui quinami quitalo yehuanten pin lalticpan hual amo quiximatilo Dios. Huan mas que tiquiximatinijme Cristo quinami quitalo yehuanten pin lalticpan, axan yajmo tiquiximatilo yojque. ¹⁷Huan yoje sinda se mochíac se ca Cristo ilacames, axan yihual unca lalac lachihuali yancuic. Yajmo cate innojen calica pehuac yulic pan lalticpan hual quichihualtic quiman ayamo mochíac

ilaneltocani Cristo. Xicmatican inon. Axan, mochi hual quichihualtía unca yancuic, yuli ca se yulilisli yancuic.

¹⁸Mochi inon quimaca Dios. Yihual quijcuanic in hual tejxiluc pa camo ticayalosquiaya ca yihual, inon hual tejchihuilini pa timoxtin tiyesi ilacocolinijmes. Axan yajmo ticate ilacocolinijmes. Huan Dios quichíac yoje pan ipampa Cristo imiquilisli. Tejchíac ilanahuatinijmes pa tiqinnnextilisli lacames quinami Dios yajmo quinmita quinami ilacocolinijmes. ¹⁹Inon quinequi quijtúa pampa Dios cataya ca Cristo huan Cristo yoje quipiaya Dios ilahueliltilisli pa quijcuanis inon hual quinchihuilic yehuanten pin lalticpan pa yelosquiaya ilacocolinijmes Dios. Huan quinhueliltic pa mochihuasi ilacames. Yajmo quinmotexpahuilijtica pampa catanijme lajllaculi. Huan mochinlanilic in lanahuatilisli hual unca quinami axan quinequi quinmita moxtin quinami ilacames. ²⁰Yoje, tehuanten ticate lanahuatinijmes pa Cristo. Dios qintemachijtica lacames pa mochihuasi ilacames, qintemachijtica pan topampa tehuanten. Tehuanten tiqijtulo ilamachiltilisli Cristo quinami cataya yihual hual lajtuaya, tilajtulo pa ticchihuasi niman hué. Huan antimitzyantiticate chicahuac, ximochihuacan pa yajmo ancayas ilacocolinijmes Dios. ²¹Pa tejchihuilisli cuali tehuanten, Dios quilalilic Cristo ilatexpahuilisli mochi inminlajllaculisli moxtin yehuanten pin lalticpan. Inon quichíac pa yoje Cristo panus ilacocolitilisli mochi lajllaculisli, mas que Cristo amo quiman quimatic quichíac lajllaculisli. Quichihuilic Dios inon pa yoje tehuanten Dios techitasquiaya jan cuali quinami yihual unca cuali amo quipixtica lajllaculisli nindeno. Huan tejchihuilic Dios inon pan ipampa Cristo.

6 Tehuanten hual titequipanujticate ca Dios, antimitztemachilo chicahuac, xicmacahuiltican pa anmijchihualtis in cuali hual Dios tejchihuilía. Ma camo huala jan lapic (de in balde) ca amhuanten. ²Tiquijtulo inon, pampa Dios quijtúa pa ilajtol lajcuiluli:

Pa in tonali hual niqijttuc cuali, nimitzcaquic,
huan nimitzpalehuic pan in tonali quiman ticataya laquixtili pa ipolehuilisli molajlaculisli.

Xiquitacan. Axan unca in tonali hual quijtuc cuali huan quilalic. Xiquitacan. Axan unca in tonali hual anmitzquixtis Dios pin ipolehuilisli anmolajlaculisli.

³Amo ticchihualo nindeno hual quitzacuilis se pa camo canas iojli Dios. Amo ticnequilo pa moitilis len amo cuali ca quinami ticchihualo Dios itequipanulisli. ⁴Huan quinami tehuanten ticate Dios itequipanujquimes, yoje pan ipampa mochi lachihualisli, timonextilo tehuanten lacames hual tiyulilo quinami Dios quinequi. Yoje tiyulilo tipanujticate mías amo cuali hual tejchihuililo hual amo huil timoquixtililo pa inon. Tiyulilo timoizticate capa monequi pa ticpiasi mías hual amo huil ticanasi. Tiyulilo capa lacames tejchihuililo niman amo cuali. ⁵Techhuitequilo, tejtzacualo pa calijtic, majcoquilo lacames techixnamiquiljticate pa tejchihuilisli tetzcuinuc. Ticpialo pa titequipanusi chicahuac huan pampín tisiahuilo mías. Cate mías layuajmes amo techmacahuiltilo pa ticochisi, huan mías tonalijmes tipanusi timayanticate. ⁶Ma yoje tilanextilo pampa ticate ixolomes Dios pampa tiyulilo chipahuac huan pampa ticpialo lajmatilisli hual tiquitalo pa Dios ilajtol. Ticnextilo pampa amo ticalantiquisalo, huan pampa ticate

cuali ca oc sequin. Ticnextilo pampa ticpialo pa toyolo in Espíritu Santo huan pampa tiquinlasojlalo lacames laijtic toyolo tiquinchihuiljticate cuali. ⁷Tilanextilo pampa ticate Dios ixolomes pampa tiquijtulo len unca melahuac, huan pampa Dios quinnextilía moxtin ichicahualisli ca mochi hual ticchihualo. Ticnextilo pampa ticpialo innojen calica huil timoanalo ipan in hual amo cuali. Pa inon Dios techueliltía, pampa yihual techita lacames hual amo ticate laijlaculi. Yoje timoanasi ca Satanás pampa Dios qilalac pa timoanasi quiman yes tiquitalo in amo cuali pa tomajma cuali huan tomajma amo cuali, capa yes Satanás quinequi techana.

⁸Timonextilo pampa ticate Dios ilacames quiman oc sequin techmacalo momajtilisli o quiman tejtzacuililo pa camo ticpiasi mochi hual unca toyaxca pa ticpiasi o ticchihuasi, huan pampín tejxixiculo lacames. Timonextilo quinami Dios ilacames sinda laquetzalo tetzcuinuc huan sinda laquetzalo cuali inahuac in hual ticchihualo huan tiquijtulo tehuanten. Tejchihuililo quinami islacinijmes, huan ma yoje tilacames mejmelahuac.

⁹Quijtulo pampa tehuanten quinami lacames hual amo monotzalo pa quinmiximatis se. Ma yoje, capa cate ilacames Dios techiximatilo cuali. Ca sequin nesi ca nadita tialo timiquilo, huan ixiquitacan! Dios techquixtía pin polehuilisli pa tiyultiasi. Techitalo quinami lacames hual Dios quincocoltitica pampa ticate laijlaculi huan ma yoje ayamo ticate lamictili.

¹⁰Techitalo quinami lacames hual quincocojtica inminyolo huan ma yoje ticpialo paquilisli. Techitalo quinami lacames hual amo quipialo nindeno, huan ma yoje tiquinchihuililo lacames mías pa yoje quipiasi in mías hual Dios quinmaca. Techitalo quinami

lacames hual amo quipialo nindeno hual inminyaxca huan ma yoje ticpialo mochi hual techmaca Dios hual unca toyaxca noje.

¹¹Tocnían pa Corinto, amo timotzacuilije pa camo antimitzilisi mochi in totequipanulisli. Antimitznequilo m'fac. ¹²Tolasojlalisli pa amhuanten amo unca tipichin. Neli tehuanten titemilo ca lasojlalisli pa amhuanten. Ma yoje ca amhuanten, nesi quinami amo antechlasojla m'fac tehuanten. ¹³Axan annimitzilíá inon quinami niquinmilisquiaya xolomes: Xitechuepilican quinami antimijchihuilije, xitechlasojlacan m'fac, amo jan nadita san.

**Tehuanten ticate mochi sejse
quinami tiopan capa chanti
Dios laijtic tehuanten**

¹⁴Amo ximonamictican ca yehuanten hual amo quineltoocalo toTata. Huan amo ximochihuilican lajtulisli calica anmijchihualtilo quinami yehuanten. Yehuanten hual yulilo quinami Dios quinequi neli amo huil yulilo ca yehuanten hual amo quinequilo yulilo quinami quinequi Dios. Huan aquinojen quipialo ilahuilisli Dios laijtic capa inminyolo amo huil yesi ca se lajtulisli ca yehuanten hual inminyolo unca laticumac. ¹⁵Huan amo huil cate ca se lajtulisli Cristo huan Belial. (Belial unca oc se itoca Satanás.) Se hual quineltooca Cristo amo quipía laxilulisli ca in hual quipía se hual amo quineltooca Cristo. ¹⁶Huan amo unca ca se lajtulisli capa chanti Dios huan capa cate in monos hual lacames quinmolancuacuetzililo. Inon unca pampa tehuanten ticate itiopan Dios hual amo mocahua pa yulis (hual yuli mochipa), jan quinami quijtúa Dios:
Niyulis laijtic yehuanten huan
nichantis pa yehuanten
inminyolo,

huan niyes inminDios huan yehuanten yesi nolacames.

¹⁷Pampín, in Tata noje quijtúa:

Yoje, xiquisacan nepa capa yehuanten hual amo nechneltocalo, huan ximocahuacan laxiluli capa yehuanten, ximocahuacan pa anquijtus huan anquichías len calica Dios anmitzitas la'anilitili ca laijlaculisli.

Cuaquinon annimitzixnamiquis ca lanequilisli,

¹⁸huan niyes anmoTajtzin amhuanten huan amhuanten anyes noxolomes lacames huan sihuames, quijtúa in Tata hual quipía mochi chichahuilisli.

Yoje quijtúa in Tata.

7 Lasojli nocnían, Dios quilic neli quinami yihual yahui quichía mochi inon. Pampín, ma timochipahuilican mochi hual quinchihuilía lacocoltilisli tocuerpo huan toyolo. Ma timochihuacan lacames hual quimatilo yulilo quichijtcate mochi cuali. Yoje momatis pampa ticate Dios ilacames, tiyulticate quinami yihual quinequi pa tiyulisi, pampa timomajtilo ilaixpan Dios ca lasojlalisli.

**Quijtúa quinami in corintotecos
mopalaje pa inminyolo**

²iXimotolinican pa anquimatis in hual ticnequilo tiquijtulo jan quinami antechiximati! Amo tijcayahuaje amaqui, amo tiquijlaculije amaqui ilaneltoocalisli, amo tijcuajcuamanaje amaqui pa ticanalosquiaya len iyaxca. ³Amo annimitzilijtica inon quinami nicataya annimitzmozexpahuilijtataya, pampa amo quipía m'fac quiman annimitzilic quinami antimitzlasojlalo m'fac. Niman m'fac tiyulilosquiaya ca

amhuanten huan timiquilosquiaya ca amhuanten sinda Dios quinequiaya. ⁴Niquijtúa niman chicahuac pa noyolo pampa amhuanten anyulis anquichijtica in cuali hual monequi pa anquichías. Nilajtúa hué anmonahuac amhuanten. Nicpía mosehuilisi hué pa noyolo pan anmopampa, niunca lalacahuatili. Mas que tipanulo mías hual amo cuali, ma yoje nimocahua ca niman mías paquilisli.

⁵Quema, tipanuloaya mías hual amo cuali, pampa quiman tiajsije pin lalticpan Macedonia, amo huil timosehuiloaya pa tocuerpos nindeno. Techtojtocaloaya pa tejchihuuilosquiaya tetzcuinuc mochi cajcapa timoitililoaya. Lacames hual amo quineltocalo technamiquije totenco pa tejchihuilisi mochi amo cuali. Huan laijtíc toyolo mochi tonali timomajtiloaya. ⁶Ma yoje, Dios quinlacahuatía yehuanten hual amo quipialo chicahualisli pa inminyolo, huan techlacahuatic pan ipampa Tito pan tonali hual ajsic. ⁷Huan amo ticataloaya lalacahuatili san pampa yihual hualac. Noje timolacahuatije pan ipampa in lacahuatilisli calica amhuanten anquilacahuatic. Quema, timolacahuatije pampa yihual techilic quinami anquinequi mías antechitas, huan quinami anmitzcocúa anmoyolo pampa nechcocuc noyolo pampa anpanujtica umpa in hual amo cuali. Huan timolacahuatije pampa techilic quinami anquinequi annechnapatía huan quinami anquichijtica quinami annimitzilía. Pampa inon nicataya ca niman mías paquilisli.

⁸Annimitzilía leca. Sinda annimijchiuilic pa anmitzcocuhuaya anmoyolo pan ipampa noamal, ma yoje amo nechcocúa noyolo axan, mas que quiman annimitztilanilic in amal, quema, nechcocuhuaya. Nechcocuhuaya pampa nicmatiaya

quinami in amal quicocoltisquiaya anmoyolo, mas qee anmitzicnotiaya jan pa je tipichin san.

⁹Ma yoje, quinami unca axan, niunca ca paquilisli. Amo niunca ca paquilisli pampa anmitzcocuc anmoyolo. Niunca ca paquilisli pampa anmitzcocoltic anmoyolo in amal huan pampín anquipalac anmoyolo pa anlajtusquiaya pa anmoyolo quinami Dios lajtúa. Inon cataya pampa anquiapiaya se icnotilisli hual Dios anmitzmacac, huan yoje amo anquipoluc nindeno pan topampa. ¹⁰Sinda Dios anmitzicnotiltía, yoje anmitzpalaltilía anmoyolo pa anlajtus pa anmoyolo quinami yihual. Huan inon anmitzquixtía pin ipolehuilisi laijlaculisli. Huan amo anicnotis pampa panujtica in amo cuali capa amhuanten. Sinda amhuanten anicnotía yoje quinami quincocúa inminyolo yehuanten pa in lalticpan hual cate laijlaculi, cuaquín in icnotilisli amo anmitzpalettehuía. San anmitzmacahuatía pa anmiquis. ¹¹Anquimati inon, pampa xiquitacan quinami anmitzpalettehuic in icnotilisli hual Dios anmitztilanilic. Axan anunca lacames hual niman anquinequi anyuli quinami Dios quinequi. Huan xiquitacan quinami axan anquinequi niman mías pa anquinnextilía moxtin pampa yajmo anmotexpahuía ca nindeno. Xiquitacan quinami axan ancualantica pampa quichijiticate in amo cuali sequin capa amhuanten hual noje cate Dios ilacames. Xiquitacan quinami axan anmomajtitica pampa in amo cuali panujtica capa amhuanten. Xiquitacan quinami axan anquinectica mías annehita oc seja huan anquinectica pa annimitzitas cuali. Xiquitacan quinami axan anquinejnequi pa mochi quisas cuali pa nehual huan pa Dios itequipanulisli. Xiquitacan quinami ca mías lanequilisli anlajlaniaya huan ancajuac pa moquixtis pa amhuanten in se hual quichíac in amo cuali.

Ca mochi hual moitaya ca in lachihualisli, anmonextilic neli quinami amo anmoijlacultía nindeno pampa inon. ¹²Yoje, mas que annimitzijcuiluilic, amo cataya mochi pampa quichíac yihual in lachihualisli amo cuali. Huan amo cataya mochi pampa inon hual quipanuc yihual hual panuc in amo cuali hual quichihuilic. No, annimitzijcuiluilic pa yoje, quinami Dios anmitziztica, anajsis anquimatis amhuanten nojen quinami annechneltocas ca mochi anmoyolo. ¹³Pampín ticate ca paquilisli pa toyolo. Timocahualo lalachahualtili, timoitalo ca chichahualisli pa toyolo.

Huan noje, pampa yoje timolacahualtije tehuanten, ticpialoaya míac paquilisli pampa cataya Tito ca niman míac paquilisli. Yihual cataya yoje, pampa quipíac mosehuilisli pa iyolo pan anmopampa anmoxtin. ¹⁴Niclaquetzilic lajtomes huejué pampa anquichihuaya yoje. Pampín, amo nicataya lapinahualtili. Ma yoje, jan quinami mochi hual antimitzilije unca melahuac, jan yojque momatiaya melahuac in huejué lajtomes hual tiqijtuje pampa anyuli pa in Tata. ¹⁵Huan pampa inon, yihual Tito anmitzlasojla míac, pampa quijnamiquía quinami anquineltoac huan quinami anquinamiquic anmomajtitataya huan anyuyucatataya pan tonali hual ajsic ca amhuanten. ¹⁶Nicpía paquilisli, pampa huil niquijtúa chichahuac ca mochi noyolo pampa amhuanten anquichías mochi cuali hual monequi pa anquichías.

Dios ilacames quimatilo quimaca len quipialo pa lapalehuisi

8 Nocrían, ticnequilo pa anquimatis oc sejpa quinami unca in cuali hual san Dios huil tejchihuilía. Inon monextilic capa yehuanten hual quineltoacal pin lalticpan Macedonia.

²Panuje niman míac lacocoltisli inminpampa yehuanten hual quincocolilo. Ma yoje quipialo niman míac paquilisli, huan mas que cate lacames hual san quipialo naditita, ma yoje quinechicujque niman míac pa quinmacasi yehuanten hual amo quipialo. ³Huil annimitzilía neli, quimacaje quinami huil ca in hual quipiaje. Quema, neli quimacaje pa yehuanten mas que amo quipialoaya len pa quinmacas. Huan quimacaloaya amo pampa nehual niquinmilic pa quimacaje. Cataya pampa yehuanten san quinequiloaya. ⁴Quema, techtemachijque ca mochi inminyolo pa tiquinchihuililosquiaya cuali pa tiquinmacahuiltilosquiaya pa quimacasi inminlajco pa quimpalehuisqui Dios ilacames jan quinami quimpalejticate in oc sequin. ⁵Huan amo quimacaloaya quinami tiqijtuloaya pa toyolo yahuloaya quimacalo. Inon hual monotza niman míac, motemacajque yehuanten nojen ca in Tata, huan cuaquín motemacajque ca tehuanten quinami Dios quinequic. ⁶Huan pampa quichihuaje yoje, tiqiyantije Tito pa quilamis quichías capa amhuanten itequipanulisli in cuali hual san Dios huil quinchihuilía lacames. Inon ilanechiculisli mochi in tomin hual quinequilo quimacalo Dios ilacames. Quinami pehuaje quinechicuje in tomin, tiquilije pa quichijtiahuilosquiaya. ⁷Axan, quinami anquichía niman cuali mochi hual anquichía, ximoiztiacan pa anquichías cuali in itequipanulisli in cuali hual Dios anmijchihuilía, pampa anquineltoac in Tata niman cuali. Huan anquilamachiltía ilajtol Dios niman cuali, anquipía niman míac lajmatilisli. Huan anyuli anquichijtica Dios itequipanulisli niman cuali, huan antechlasojla niman cuali. Pampín, monequi pa anquichías in tequipanulisli quinami anquichía mochi niman cuali.

⁸Ma yoje, amo annimitzilijtica chichahuac pa anquichías quinami quichihuaje yehuanten. San nicnequi pa anquitas quinami ca mías lanequilisli oc sequin quinpalehuilo Dios ilacames hual amo quipialo hual monequi pa quipiasí. Huan yoje amhuanten noje huil anquimatis sinda neli anquinlasojlatica Dios ilacames quiman anquinmita jan quinami anmoita amhuanten. ⁹Yojque techlasojla toTata, pampa anquimati in cuali hual toTata Jesucristo tejchihuilía. Mas que quipiaya mías, ma yoje mochíac lacal hual amo quipiaya nindeno pa yoje annijchihuilisquiaya cuali, pa yoje anmochíasquiaya amhuanten lacames hual quipialo mías pan ipampa quinami yihual mochíac se hual amo quipiaya nindeno.

¹⁰Axan, annimitzilía quinami niquijtúa pa noyolo ca in itequipanulisli in cuali hual Dios tejchihuilía: Unca cuali axcan pa amhuanten anlaquisas ca inon hual axan quipía se xíl quiman anpehuac anquichíac. Huan amo san anpehuac anquichíac, noje anpehuac anquinequic anquichíac. ¹¹Axan xilaquisacan pa yoje quinami anmolalic chichahuac pa anquinequic anquichíac, amhuanten jan yoje anquinequis mías pa anlaquisas anquichías quinami huil anquichías ca in hual anquipía. ¹²Yoje yes cuali, pampa da unca lanequilisli, cuaquinon Dios quita cuali in hual quimaca se sinda quiquixtilía ilajquito in hual yihual quipía. Dios amo quijtúa pa se quimacas ilajquito inon hual amo quipía.

¹³Amo nicnequi pa oc sequin cayasi lamacahuali pa camo quimacas len, sinda pan ipampa inon amhuanten anyahui anquipía pa anquimacas mías sinda amo anquipía mías. ¹⁴San nicnequi pa cayas jan yoje pa moxtin. Cuaquín ca in mías hual anquipía axan, cayas cuali pa anquinmacas

anmolajquito yehuanten hual amo quipialo in hual monequi pa quipiasí. Huan yehuanten anmitzcuepilis pan ipampa quinami anmitzmacasi inminlajquito in mías hual quipialo mías hual monequi pa amhuanten anquipías. Huan yoje quisas jan yoje pa moxtin. ¹⁵Quinami unca lajcuiluli pa ilajtol Dios, quijtúa: “Aqui quipejpenac mías amo quicahuilic mías. San quicahuilic hual monequiaya pa quipiasquiaya. Huan aqui quipejpenac nadita noje quicahuilic mochi hual monequiaya pa quipiasquiaya.”

Tito huan itocanjmes

¹⁶Huan ma ticsehuican Dios pampa quilalic pa iyolo Tito pa quinequis pa huil quitas ca amhuanten in lanequilisli hué pa anquinchihuilis cuali yehuanten hual amo quipialo, jan yoje quinami in lanequilisli hual annimitzpillá pa noyolo. ¹⁷Niquijtúa inon pampa yihual quipiaya paquilisli quiman tiquiyantije pa yahuisquiaya capa amhuanten. Huan amo in san. Noje yahui capa amhuanten pampa yihual niman mías quinequiaya yahui.

¹⁸Ca yihual Tito, tictilanticate pa quitocas in tocní hual quiximatilo niman cuali moxtin in laneltocanjmes cajcapa monechiculo pa quimolancuacuetzilisi Dios. In tocní quiximatilo pampa quilamachiltía in lamachiltisli cuali. ¹⁹Huan amo in san. Noje in laneltocanjmes cajcapa monechiculo quilajultije pa canas ojli ca tehuanten quiman ticchijtcate in itequipanulisli in cuali hual Dios quinchihuilía lacames. Ticchijtcate in tequipanulisli pa yoje toTata quincacuis mías lajtomes huejué huan cuajcuali hual quilisi ilacames, huan pa yoje quinextis tolanequilisli calica tiquinpalehuisi Dios ilacames. ²⁰Yoje ticnequilo tictzacuililo aqui yes techmotexpahuilisquiaya inahuac

quinami tiquinxiluilijtcate Dios ilacames hual amo quipialo len. ²¹Unca pampa timotolinilo pa ticchihuasi quinami Dios quita cuali. Huan amo in san, noje ticchihuasi quinami lacames quitalo cuali.

²²Huan ca yehuanten tictilanticate tocní hual sejpa huan oc sejpa míac ticchihuilije pa ticmatilosquiaya quinami quichihuaya mochi. Huan yoje tiqitaje pampa tequipanúa míac, yihual unca se lalac hual neli quinequi quitequipanuilía in Tata. Axan yihual quinequi niman míac pa quichías in tequipanulisli, pampa quijtrúa chichahuac pa iyolo pampa amhuanten anquichías inon hual monequi pa anquichías. ²³Sinda se quinequi anmitzljalanía quinami quichías Tito, annimitzilfa yihual nolasojli huan titequipanulo ca yihual pa amhuanten. Huan pa anquimatis quinami lachihualo tocnían hual tiquintilanticate, yehuanten inminlanahuatinijmes in míac inminlanechiculisli laneltocanjmes hual cajcapa monechiculo quimolancuacuetziliztcate Dios pan ipampa itoca Cristo. Mochi in míac lanechiculisli quinextililo moxtin pin lalticpan Cristo ilaixpelalisli cualtichin huan ichicahualisli hual san yihual quipía. ²⁴Pampín xicnechicucan in tomin pa yehuanten hual amo quipialo, huan yoje anquinextilis inminlaixpan moxtin laneltocanjmes quinami anquinlasojla Dios ilacames, huan quinami unca melahuac quinami tiquinlaquetzililo hué ca oc sequin lacames quinami anquitequipanuilía in Tata.

**In tomin hual quinechicujque
pa in laneltocanjmes
hual amo quipialoaya**

9 Axan amo nadita monequi pa annimitzijcuilulis inahuac

inon hual anquinctica anquinmaca Dios ilacames. ²Nicmati quinami míac anquinctica. Nilaquetza hué inminlaixpan yehuanten pa Macedonia quinami amhuanten anquichijtica. Niquinmilía quinami amhuanten pin lalticpan Acaya anlaquisac ca in lanechiculisli axan quipía se xihuil. Huan pampa quimatilo quinami anquinequi míac pa anquichías inon, yoje in míac ca yehuanten noje canaje lanequilisli pan ipampa anmolanequilisli. ³Ma yoje, niquintilantica tocnían pa camo cayas jan latic (de in balde) quinami tilajtuje hué inahuac quinami amhuanten axan anquipía lanechiculi in tomin. Pampa niquinmilic quinami ancayasquiaya ca in lanechiculisli lachihuali, niquintilantica pa yoje neli ancayas ca in tomin lanechiculi. ⁴Niquintilantica amo san gá in sinda sequin macedontecos yasi ca nehual, huan quiman ajsisi umpa huan quitasi pampa amo anunca lachijchihuali pampa ayamo anquinechicuc in tomin, yoje tipinahuasi pampa tiqijituloaya pa toyolo pampa neli anyesquiaya lachijchihuali. Huan amhuanten noje neli anpinahuaya sinda ayamo ancataya lachijchihuali. ⁵Pampín, niquijtuc pampa monequi pa niquinyantis tocnían pa yasi capa amhuanten huan pa nehual ayamo nías, pa yoje yehuanten laicanasi quilaquisaltisi mochi hual moita ca inon hual anquijtuc neli pampa anyahuiaya anquimaca, pa yoje cayas lachijchihuali. Ma yoje, amo ticnequilo pa yes quinami len antimizquijquixtilijtcate quinami se ilapixcalisli tomin. San ticnequilo pa yes quinami len hual anquinequi anquimaca.

⁶Inon niquijtutica: Aquí latoca jan nadita yahui lapixca jan nadita. Huan aquí latoca míac yahui lapixca míac. Jan yoje aquí quimaca nadita

quipías san nadita in cuali hual Dios quinchihuilía lacames. ⁷Monequi pa mochi seje quichías quinami quijtuc pa iyolo pa quichías. Ma camo quimaca quinami se hual amo quinequisquiaya, ma camo quimaca quinami quichihualtificate, pampa Dios quilasojla se hual quimacatía len ca paquilisli huan quixtoca quimaca.

⁸Huan Dios huil anmitzmaca míac pan ipampa mochi in cuali hual san yihual huil quinchihuilía lacames, pa yoje anquipixtías mochi hual quinequi anmitzmaca. Huan amhuanten

noje huil anquimacas míac pa huil anquichías mochi tequipanulisli cuali.

⁹Jan yoje unca lajcuiluli Dios ilajtol:

Quinmaca cajcapa yesi yehuanten hual amo quipialo, quinami se hual quixintía latocli.

In cuali hual quichía huejcahuas huan amo quiman lamis.

¹⁰Dios hual cana latocli pa quimacas se hual latoca huan quimaca pan pa lacualisli, yoje yihual anmitzmiactilis anmochicahualisli pa anquinchihuilis cuali oc sequin. ¹¹Quema, Dios anmitzmacas míac pan ipampa mochi in cuali hual huil anmijchihuilía. Huan yoje huil anquinmacas míac yehuanten hual amo quipialo. Huan pan tonali hual canaló inon hual tehuanten tiquinhuiquilisli yehuanten, cuaquín laquisas ca yehuanten quisejticate Dios.

¹²Quema, pampa sinda tictequipanulisli Dios tiquinhuiquilijticate in tomin, amo san ticmacaticate Dios ixolomes len monequi pa quipiasí. Noje inon hual tiquinchihuililo quisas ca yehuanten quisejticate Dios míac. ¹³Quiman anquichía in tequipanulisli yoje anquinpalejtica Dios ixolomes. Yoje inon quinextilis quinami anquilía Dios lajtomes huejué huan cuajcuali pa anmoyolo pampa anquineltocha in hual quijtúa in lamachiltisli cuali hual anquilamachiltía. Huan anquilis

lajtomes huejué huan cuajcuali pa anmoyolo pampa anquimaca míac pa yulisi cuali yehuanten huan moxtin oc sequin. ¹⁴Pampa inon, yehuanten quinequisí míac pa anmitzitasí pa anmitziximatisí. Huan quilajlanisí Dios pa amhuanten, pampa Dios anmijchihuilic niman míac ilachihualisli cuali pa anmoyolo. ¹⁵¡Ma ticsehuican Dios pampa yihual tejchihuilía cuali yoje míac! ¡Amo huil tiquinmijnamiquilo lajtomes pa tiquijsusí quinami unca hué in cuali hual tejchihuilía!

Pablo quijsucilúa quinami yihual quipía lahueliltisli hual unca iyaxca se ilanahuatini Dios

10 Nehual, Pablo, annimitzyantía inon, quinami Cristo anmitzyantisquiaya, ca lajtomes amo la'ajuali huan amo chijchicahuac. Xicmatican len quinequi quijtúa in hual nía annimitzilía. Quijtulo sequin pampa nehual nimomajtía quiman annimitzixnamiquía, noixco ca annoixco. Ma yoje, quiman amo niunca ca amhuanten, cuaquín, quijtulo, annimitzlaquetzilia chicahuac, amo nimomajtitica. ²Axan annimitztequijsitica inon. Quiman yes nihualas ca amhuanten amo xijchihuilican pa nicpías pa nimonextis nicualantica ca sequin hual nicpías pa niquinmixcomacas. Quijtulo pampa ticate lacames hual lachihualo yoje quinami lachihualo yehuanten pin lalticpan hual cate laijlaculi. ³Inon amo unca neli, pampa mas que tiyulilo pin lalticpan, ma yoje amo timoanalo quinami guaches pan se moanalisli. ⁴Innojen calica timoanalo amo cate in teposlimes hual quinmulalo in guaches. Innojen calica timoanalo quipialo ichicahualisli Dios pa quixitinisí mochi hual mochía chicahuac pa quisulahuas Dios ilajtol. ⁵Yoje, ticsulahualo

quinami lajtulo pa inminyolo lacames quinami yehuanten. Mochihualo hué pa quimotexpahuilisi Dios huan pa molalisi pa lajtusi quinami icocolinijmes pa yoje motzacuilisi pa camo quiximatisi Dios. Mochi in hual quijtulo, inon ticsulahualo pan ipampa Cristo. ⁶Huan ticate lachijchihuali pa ticmacasi tixuxli pa mochi inminlajlaculisli yehuanten hual ayamo quinequilo laneltocalo. Huan inon ticchihuasi quiman yes amhuanten anmonextilis quinami anquineltoqa cuali mochi ilajtol Dios.

⁷Amhuanten anquita huan anquijnamiquía mochi jan quinami nesi se pa quiahuac. Sinda se quijtúa chicahuac pa iyolo pampa yihual se ca Cristo ilacames, ma moijnamiquilti inon: Jan quinami yihual unca iyaxca Cristo, jan yoje ticate tehuanten.

⁸Techmacac in Tata tolahuelilitisli pa antimijchihuilisi cuali, amo pa antimitzijlacusi. Pampa inon, amo nechpinahualtía sinda nilajtúa nadita hué inahuac tolahuelilitisli.

⁹Amo niyesquiaya quinami annimitzmajtisquiaya ca noamames.

¹⁰Ma yoje, quijtulo yehuanten: “Pablo lajtúa ca chicahualisli. In lajtomes hual yihual quijcuilúa cate ej'tetic pa quichías se huan unca chicahuac. Ma yoje, quiman unca ca tehuanten, cuaquín momajtía, huan in hual yihual quijtúa huil ticxiixculoc.” Yoje quijtulo.

¹¹Axan, nehual niquijtúa, lacames hual quijtulo yoje, ma quimatican len quinequi quijtúa inon. Inon hual tiquijtulo ca toamames sinda amo ticate capa amhuanten, jan yoje ticchihualo sinda ticayasi capa amhuanten.

¹²Neli timomajtilo tiquijtulo pa toyolo pampa ticate jan yoje quinami oc sequin hual momatiltulo. Amo tictemulo pa tiquinmitalo oc sequin pa ticmatisi sinda tiajsilo ticayalo

quinami yehuanten. Yehuanten hual molamachihuililo ca yehuanten inminlamachihualoni amo quimatilo quijnamiquilo. Noje amo quimatilo quijnamiquilo sinda moitalo pa quimatisi sinda cate jan quinami oc sequin. ¹³Tehuanten amo tiquijtusi inahuac ticate hué tehuanten. San tiquijtusi inon hual techmonotzilía. Tilajtusi hué san ipampa inon hual Dios techlalilic. Unca tolajquito itequipanulisli. Huan tilajtusi hué ipampa inon capa techlalic pa tictequipanulisli. Huan techlalilic pa tiajsisi pa tictequipanulisli capa amhuanten. ¹⁴San tilaquetzalo hué inahuac totequipanulisli capa amhuanten. Tilaquetzalo ca in laquetzalisli hual unca toyaxca, pampa quema, tiajsije capa amhuanten pa antimitzilisli Cristo ilamachilitisli cuali. Sinda amo tiajsiloaya capa amhuanten pa ticpehualtisi in lamachilitisli cuali, cuaquín amo cataya toyaxca pa tilaquetzasi hué inahuac totequipanulisli. ¹⁵Huan san tilaquetzalo hué inahuac inon hual Dios techlalilic. Nicnequi niquijtúa, amo tilaquetzalo hué tonahuac tehuanten quinami cataloaya tehuanten hual ticchihuaje inon hual quichihuaje oc sequin lacames. Inon hual, quema, ticchixticate pa panus neli capa amhuanten unca pa mochías niman hué in tequipanulisli hual huil ticchihuasi capa amhuanten. Noje ticchixticate pa huil tiajsisi huejca ca in lamachilitisli cuali huan amo pa titequipanusi san capa anchantis. Tiquijtulo neli pa toyolo pampa yahui caya yoje pampa anquilalis annolaneltoocalisli ca in Tata oc se nadita huan oc se nadita mojmosta. ¹⁶Yoje, huil tiquinmachiltisi Dios ilajtol pin lalimes hual mocahualo ca yoje capa unca anmolali. Ma yoje, ma ye san ca capic Dios techlalilic tehuanten pa

tictequipanuilisi. Cuaquín amo tilajtusi hué tonahuac tehuanten quinami cataloaya tehuanten hual ticchihuaje tequipanulisli hual quichíac oc se točni capa Dios quilalilic pa quitequipanuilis.

¹⁷Sinda se quinequi laquetza hué pampa inon hual san yihual quichíac, ma camo quichía. ¡Ma laquetza hué quijjtutica quinami quichíac cuali in Tata! ¹⁸Inon tiquijtulo, pampa Dios amo quita cuali in se hual lajtúa hué pampa quichíac len yihual ihuían. Sinda yihual in Tata lajtúa hué pampa quichía se inon, yoje momatis pampa quita cuali.

In lanahuatinijmes hual islacatilo

11 Nicnequisquiaya pa anquicaquis nadita laquetzalisli hual nesis quinami nilajjtutica quinami se hual amo quimati len quijjtutica. Quema, xijcaquican in laquetzalisli amo ansiajtica huan amo ancualantica pampa nía annimitzilía inon. Neli annechpilía lanequilisli pa annechcaquis. ²Nichahuatía pa amhuanten, Dios nejchihuilic pa nilajjnamiquis yoje pa noyolo, pampa annimitzanac pa anyes quinami sihual yancuic hual monamictía ca Cristo. Unca quinami sihual yancuic huan chipahuac hual yes iyaxca ilahuical, in se san hual iyaxca in se ilahuical. ³Ma yoje, san quinami in cuhual quicuajcuamanac Eva ca islacatilisli pa camo quineltocas Dios, nimomajjtica amhuanten noje annijcuanis pan iojli Cristo pampa cuajnesi anlajtúa yoje pa anmoyolo. Huan yoje yajmo anquilasojlas Cristo quinami monequi quilasojla se sihual yancuic ilahuical ca se laijnamiquilisli chipahuac. ⁴Nicnequi pa anquicaquis inon hual nehual annimitzilis. Nicnequi pa anquicaquis pampa amhuanten amo anhuejcahua pa anquimacahuilits pa anmitzmaxtis se hual huala capa

amhuanten pa anmitzlamachiltía pampa unca oc se Jesús hual quipía oc se lamaxtilisli. Yihual amo quinami in Jesús hual antimitzlamachiltije. Amo anhuejcahua pa anquineltocas oc se espíritu hual amo in Espíritu Santo hual anpehuac anquineltocac. Huan amo anhuejcahua pa anquimacahuilits oc se pa anmitzyantis pa anquineltocas se lamachilitisli hual amo unca in lamachilitisli cuali. ⁵Amo unca cuali pa anquimacahuilits pa anmitzyantis yoje yehuanten. Niquijtúa nehual amo niunca se hual monequi pa niqitas oc se hual nechpalehuis pa niajsis nicayas jan yoje cuajcualtichin quinami in lanahuatinijmes hual islacatilo. Quijtulo pampa yehuanten lacames niman huejué. ⁶Mas que cuajnesi amo nilanotza cuali inminlaixpan lacames, ma yoje nicmati cuali len niquijtúa. Ca mochi quinami huil, tehuanten antimitzmachiltije inon ca lajtol hual moxtin quimatiloaya len quinequiaya quijtu. Huan antimitznextilije len quinequi Dios ca mochi hual ticchihuaje.

⁷Nimochíac tipichin pampa nitequipanuc pa nimolacualtic, pa yojque amhuanten huil anmochiasquiaya huejué anmochijtataya ixolomes Dios. ¿Anquijtúa cataya laijlaculisli pa nehual pampa annimitzmachiltic ilamachilitisli cuali Dios huan amo annimitzljalanic laxlahuilisli nindeno pa inon? ⁸Xiquitacan, cataya quinami nicanilic tomin oc sequin inminlanechiculisli laneltocanijmes quiman nechmacaje inmintomin pa nimolacualtic pa yojque annimijchihuilits Dios itequipanulisli capa amhuanten. ⁹Huan innojen tonalijmes nicatani ca amhuanten huan monequini pa nicpiasquiaya len, amo nicmacac tequil amaqui ca amhuanten pa nechpalehuis, pampa

tocnían pa Macedonia hual hualaje ca nehual nechhualiquilic mochi in hual monequini pa nicpiasquiaya. Huan yojque nimotzacuilic huan nimotzacuilis mochi quinami huil pa camo annimitztlalilis etialisli. ¹⁰Neli niqijjtutica inon ilaixpan Cristo hual unca lajtic nehual pa nechlaquetzaltis melahuac. Inon hual nilaqueztica hué nonahuac nehual amo yes latzacuali pa camo mocaquis pin calimes hual cate pa Acaya. ¹¹Huan ¿leca niqijjtúa inon? ¿Unca pampa amo annimitzlasojla? ¡Dios quimati annimitzlasojla!

¹²Inon hual nicchijtica, nía nicchijtía pa niquintzacuilis yehuanten hual quitemulo quinami huil laquetzasi hué inahuac quinami tequipanulo. Quijtulo pampa tequipanulo san quinami tehuanten titequipanulo. ¹³Lacames quinami yehuanten cate lanahuatinijmes hual islacatilo, cate tequipanujquimes hual lacuajcuamanalo, mochijtcate quinami ilanahuatinijmes Cristo, huan neli amo cate. ¹⁴Huan ¿leca timocahualo timoiztcate, amo ticmazticate len tiquijtulo inahuac inon? Yihual Satanás mochía quinami se ilanahuatini in cielo hual quipía Dios ilahuilisi. Quema, mochía quinami se hual quichía in hual unca cuali. ¹⁵Yojque, amo timolapolulosquiaya sinda tiquitalo Satanás itequipanujquimes mochijtcate quinami lacames hual quimaxtilo islacatijtcate quinami monequi pa yulis se pa quipaquiltis Dios. In lanahuatinijmes lamisi quinami quinmahuilúa pampa quimaxtilo in amo cuali.

Quinami Pablo panuc lacocoltilisi

¹⁶Annimitzilía oc sejpa, ma camo quijtu amaqui pampa nehual amo nicmati nindeno. Sinda quema anquijjtúa yoje, xichitacan quinami nicataya se hual amo quimati nindeno,

pa yojque nehual noje nilaquetzas nadita hué nonahuac nehual. ¹⁷In hual niqijjtutica, amo niqijjtutica quinami cataya ilajtol in Tata. San niqijjtutica quinami nicataya se hual amo quimati nindeno huan ma yoje amo pinahua pa lajtus quinami unca hué yihual ihuían. ¹⁸Míac lacames quijjtulo quinami yehuanten cate hué, quinami cate huejueyenten pan ipampa len huil canaló nican pan lalticpan. Pampín niqijjtus quinami nehual niunca hué, quinami se hual amo quimati nindeno, pampa niyulic nipanujtica míac calica huil nilajtúa quinami nehual nicuali. ¹⁹Niqijjtúa yoje, pampa amo anquintzacuilía yehuanten hual amo quimatilo nindeno pa camo anmitzmxtisi, pampa anquijjtúa yehuanten quimatilo míac. Pampa inon annehmacahuiltis sinda nehual nilaquetza quinami se hual amo quimati nindeno. ²⁰Quema, pampa anquimacahuiltía sinda se lalac anmitztequipanultilis chicahuac amo anmitztlaxlajtica, o anmitzanihía len o anmitzcajcayahua o mochía hué capa amhuanten o anmitzhuejuecaltía huan anmitztecua pa annoixco. ²¹Cuajnesi nicpía pa niqijjtus: “¡Nipinahua pampa timomajtiloaya pa antimijchihuililosquiaya quinami inon!”

Ma yoje, sinda aqui yes amo momajtía pa quijjtus len inahuac quinami yihual unca hué, nehual noje amo nía nimomajtía pa nilaquetzas quinami nehual niunca hué yoje quinami yihual. Xiquijnamiquican pampa nehual nilajjtutica quinami se hual amo quimati len quijjtutica. ²²Quijtulo pampa cate hebreos hual quimatilo lajtulo ca hebreo. Nehual noje nihebreo huan nilajjtúa ca hebreo. Quijtulo pampa cate israelitos. Nehual noje, ni'israelito. Quijtulo pampa cate imiahuimes Abrahám. Nehual noje niunca. ²³Quijtulo pampa cate Cristo

itequipanujquimes. Huan nel niqijtúa niunca se itequipanujquil niman hué quinami yehuanten amo quiman cataloaya. Ma yoje xiquijnamiquican, nilajtutica quinami se hual unca pa quiahuac itzontecon. Nitequipanuc niman mías, amo yoje mías tequipanuje yehuanten. Nicataya latzacuali calijtic niman mías huan yehuanten amo quiman ajsije cayaje latzacuali yoje mías. Amo nicmati quichi tonalijmes nicataya lahuitequili huan mías tonalijmes niahuiaya nimiqui. ²⁴Ca macuili lahuitequilisli nechhuitequije in judfos ca mecal hueyote innojen treinta y nueve latecualisli. ²⁵Ca ye lahuitequilisli nechhuitequiloaya lacames ca cuahuimes. Se tonali nechlaxilijque tixcalazos. Xitiniye ye barcos capa niahuiaya pan al huejcalan. Se semilhuil huan se layúa nicataya pin al huejcalan ca itenco huejca. Nilanilujtataya pan icuahuimes in barco hual xitinic. ²⁶Mías nicanaya ojli capa nimoitaya quinami nimiquisquiaya. Cataloaya atencojmes huejué huan cataloaya laxtequinijmes. Nimoitaya ca in judfos nocnán huan ca yehuanten hual amo judfos hual quinequiloaya nechmictilo. Nimoitaya mías quinami nimictinemisquiaya pa cajcaltilan huan pa cuajlan huan pan barcos huan ca lacames hual quijtuloaya yehuanten tocnán laneltocanjmes huan islacatiloaya. ²⁷Huan nicpiaya pa nitequipanus niman chichahuac, amo nicpixtataya in hual monequiaya pa nicpías. Mías layuajmes amo huil nimocochiltiaya, oc sejpa huan oc sejpa nimayantiniemiaya huan niamictinemiaya. Quema, mías tonalijmes amo nicpiaya len nijcuasquiaya, mías tonalijmes niqiztataya sehua huan amo nicpiaya tzotzomajli.

²⁸Huan ca mochi innojen, nimoita ca itetialisli mochi inminlanechicujquimes

in laneltocanjmes. Niquijnamiquía mías moxtin yehuanten pampa amo nicmati len quinpanujtica. ²⁹Mochi sejse capa yehuanten hual panúa lacocoltilisli o laijlaculisli, ca yihual nechcocúa noyolo quinami nechpanuaya nehual yoje. Huan mochi sejse capa yehuanten sinda unca se hual quilaicanac pa quichías laijlaculisli, cuaquín nel nichichinahuiaya laijtic noyolo pampa nechcocuhuaya noyolo, nipinahuaya huan nicualaniaya. ³⁰Sinda monequi pa nilajtus hué, cuaquinon nilajtus hué pampa amo nicpía chichahualisli. ³¹In Dios huan iTajtzin in Tata Jesús, yihual hual moxtin amo mocahuasi pa quilisi lajtomes huejué huan cuajcuali, yihual quimati amo nislacatijtica. ³²Pin caltilan hué itoca Damasco, in huelitini (gobernador) hual in hué Aretas quilalic nepa, yihual quinlalic guaches pa mochi in caltilan capa calaquilo huan quisalo pin caltilan. Quinlalic nepa pa nejtzacualosquiaya pa camo nicholusquiaya. Yoje huil nechquitzquilosquiaya. ³³Huan tocnán nechtemuhuje pa se chiquihuil hué pa se lapulisli pin cali (tepani) cuajtic huan palahuac lachihuali ca tixcali hual quiyahualuaya in caltilan. Yoje nimoquixtic pin nopolehuilisli huan nicholuc.

Dios quimaxtic Pablo mías pan ipampa len quinextilic pa quitas ihuán huan pa quicaquis ihuán

12 Nicpiaya pa nilajtus hué annimitzilijtica mochi innojen hual nechpanuje nehual, mas que amo nechpalehuiaya huan amo quimpalehuiaya oc sequin. Ma yoje, niajtías niqijtutica quinami in Tata nechlaltaltic mías pan ipampa quinami laxotocalisli, huan noje quinami mías nechlacaquiltic nehual nohuán san. Cate innojen hual amo huil ticmatilo

pan ipampa tolahuellitlisli ihuán.
²Nicmati in hual quipanuc se lacal, yihual se ca Cristo ilacames hual axan quipía catorce xixihuil, cataya la'ajcoquili huan ajsic capa unca se cielo (ilhuicac) hual unca pa pani in ome cielos. Amo nicmati sinda in lacal cataya pa laijtic icuerpo (inacayo) o pa quiahuac icuerpo. Dios quimati san. ³Huan nicmati in lacal yec laquitquili pa yes la'ajcoquili. Huan sinda cataya la'ajcoquili ca icuerpo o amo ca icuerpo, jan iyolo san, inon amo nicmati. ⁴San cataya la'ajcoquili pa ilajco in cielo itoca paraiso huan nepa quicaquic lajtomes hual Dios amo quimacahuiltiaya se lacal pa quijtusquiaya sinda huil quinmijtuaya in lajtomes. ⁵Pampa inon hual quipanuc in se unca noyaxca pa nilajtus hué. Quema, nicataya in lacal huan nicmati unca melahuac in hual nijcaquic. Ma yoje, amo nicnequi nilajtúa hué inahuac in hual nechpanuc. San nicnequi nilajtúa inminahuac innojen hual lanextilo pampa amo nicpía chicahualisli. ⁶Huil nilajtusquiaya hué inahuac in hual nechpanuc, pampa sinda nicnequiaya nicchía, amo nicataya quinami se hual amo quimati len unca melahuac. Ma yoje, nimotzacuilis pa camo nilaquetzas hué inahuac inon. Yoje amaqi quijtus laijtic yihual pampa nehual niunca hué mas que cuajnesi ninesi niman hué ca oc sequin o nechitalo hué oc sequin o quijtulo pa inminyolo pampa niunca hué quiman quicaquilo in hual niquijtúa.

⁷Dios nechnextilic niman mías quinami unca yihual ca oc sequin lanextilisli pa innojen. Ma yoje, pa camo nimochihuasquiaya hué quiman niquijnamictica mochi in cuali hual nejchihuilic, quimacahuilic pa Satanás latilanis pa se ca iijyecames nechcocoltitías quinami se huizli

quitzopintica icuerpo se. Quema, in unca pa nejzacuilis pa camo nimochías hué. ⁸Pan ye latemachilisli nictemachic in Tata pa yihual quijcuanisquiaya capa nehual in iijyecal Satanás. ⁹Ma yoje, nechilic in Tata: "In cuali hual nimijchihuilía unca mochi hual monequi pa ticpías, san inon. Unca pampa nochichualisli ajsis monextilis hué ca lacames quiman yehuanten amo quipialo chicahualisli." Yoje nechilic. Cuaquinon, ca paquilisli hué, nicnequi mías pa nilaquetzas hué inahuac quinami yoje huan yoje amo nicpía chicahualisli. Nicchías inon, pa yojque ichichahualisli Cristo moitilis ca nehual. ¹⁰Pampín, pa nesis hué Cristo, nicpía niman mías paquilisli quiman nimoita amo nicpictica chicahualisli huan quiman nechuejuecaltilo huan quiman nipanúa lacocoltilisli huan quiman nechtojtocalo pa nejchihuilisli amo cuali huan quiman nimoita capa amo huil niquisa pa camo nipanus lacocoltilisli. Niquijtúa inon pampa sinda niunca amo nicpictica nochichahualisli, cuaquinon monextía ca nehual Dios ichichahualisli.

Pablo quita mías hual quichihualo laneltocanijmes pa Corinto hual quicocúa iyolo

¹¹Axan, nimochiác quinami se hual amo quimati len quijtutica. Amhuanten annejchihualtic inon. Monequiaya pa amhuanten anlajtusquiaya hué inahuac mochi hual nechpanuc nehual pa yoje amo nicpiaya pa nilajtus yojque. Ma yoje, amo anlajtuc hué inahuac in hual nechpanuc. Pampín annejchihualtic pa nilaquetzas yoje, pampa innojen lanahuatinijmes hual anquintoca moitalo huejué. Ma yoje, nehual amo nimoita tipichin inminahuac. Mas que amo nimonotza nindeno, amo niunca nadita tipichin huan yehuanten huejué.

¹²Neli unca pampa capa amhuanten,

Dios quinchíac pan nopampa innojen lanextilisli hual lanextililo quinami neli niunca se ilanahuatini ca in oc sequin. Niquinchihuaya innojen huan nipanuya mochi hual nejchihuic amo cuali hual ajsic ca nehual. Quema, niquinchihuaya innojen lanextilisli hual monextije pampa mochihualoaya ca Dios ichicahualisli. Cataloaya hual quinlachialtije ca lamajtilisli lacames huan quinnexlic Dios ichicahualisli hué. ¹³Pampín, amo niunca tipichin huan in oc sequin lanahuatinijmes niman huejué. ¿Anquijtúa pampa amhuanten ancanac jan nadita in cuali hual Dios tejchihuilía? Cate mías oc sequin ilanechicujquimes Dios ilacames cajcapa. ¿Anquijtúa pampa innojen canaje mías ilachihualisli cuali? Amo cataya yoje. O jan in san, ¿cuajnesi anquijtutica amo annimijchihuic mochi hual niquinchihuic mochi oc sequin inminlanechiculisli in laneltocanijmes quiman amo annimitzlalilic len etic pa annechlacualtis? ¡Xicpujpuhuacan in hual amo nicnequic annimijchihuic!

¹⁴Xiquitacan. Inon unca in ye lapaxaluilisli hual niunca lachijchihuali pa annimitzpaxaluilis. Huan amo annimitzmacahuiltis pa annechlacualtis. Amo nictemujtica pa nicanas len unca anmoyaxca. Quema, nictemúa quinami annimitzanas amhuanten pa in Tata. Amo nicnequi nicana len unca anmoyaxca, pampa in xolomes amo quipialo pa quinmajcoquilisli len pa inmintajtzizían. Cate inmintajtzizían hual quipialo quinmajcoquilisli len pa inminxolomes. ¹⁵Huan nehual quinami anmotajtzin nicayas ca mías paquilisli pa annimitztequipanuilis huan pa niclaxlahuis mochi, quema, mas que yajmo nechcahuilis tomin nindeno huan yajmo nechcahuilis nochicahualisli. Inon nicchiasquiaya

pa yoje annimitzpalehuis pa anquipías mochi in cuali hual Dios quipía pa anmoyolo. Huan sinda yojqe annimitzlasojlatía, cuaquín ¿amo yoje mías anyahui annechlasojla?

¹⁶Ma caya inon da amo annimitzlalilic in etialisli pa annechlacualtis. Ma yoje, quijtulo pampa nehual nicataya se hual niunca lachijchihuali pa nicchías len yes pa nicanas len nicnequiaya. Quijtulo pampa annimitzanilic len nicnequiaya ca lacuajcuamanalisli. ¹⁷¿Annimitzcuajcuamanac amhuanten pan ipampa se ca yehuanten hual nictilanic ca amhuanten? No, amo se ca yehuanten. ¹⁸Niquiyantic Tito pa yas ca amhuanten huan nictilanic in oc se tocni pa yasi huan yihual. Axan, ¿yihual Tito anmitzcuajcuamanac? Amo quiman. Tilachihuaje Tito huan nehual ticpixtataloaya toyolo tehuanten jan yoje, se quinami in oc se.

¹⁹¿Axan anquijtutica pa mías tonalijmes pampa timotolinticate pa tinesisi cuali anmolaixpan? No. San unca ilaixpan Dios tiquijtulo inon, quinami ticate se ca Cristo. Mochi hual antimitzililo unca pa antimijchicahualtisi pa momiactis anmolaneltoalisli pa Cristo, amhuanten nocnían hual annimitzlasojla. ²⁰Monequi pa anyes lachicahuiltili, pampa nimomajtitica cuajnesi quiman niajsis capa amhuanten, amo annimitzitas quinami nicnequi pa ancayas. Huan amhuanten cuajnesi amo annechitas nehual quinami anquinequi. Nimomajtía pampa cuajnesi annimitzitas anmolaxilijtica lajtomes huan anchahuatijtica huan ancualantiquisa huan san anquijtutica pa anmoyolo quinami mochi sejse huil cana len pa yihual ihuían. Huan cuajnesi annimitzitas anlaxijcujtica huan anlatenejtica

yoje lalatali huan anlajutitica hué inahuac quinami anmoita. Quema, cuajnesi annimitzitas anyultica amo ca melahualisli. Huan yoje ca nadita amo anquitas len monequi pa quichihuasi Dios ilacames. ²¹Quema, nimomajtía pampa quiman nihualas ca amhuanten oc sejpa, cuajnesi noDios nechpinahualtis anmolaixpan. Cuajnesi nicpías pa nimococus pa noyolo pampa míac capa amhuanten quichihuaje laijlaculisli huan amo mopatilije inminyolo pa lajtusi pa inminyolo quinami Dios. Quinchihuaje innojen hual Dios quinmita pucmic. Lacames canaje sihuames amo quinami quijtúa ilajtol Dios. Huan amo mocahuaje pa quinequisi quichihuasi len hual amo cana cuali. Quema, nimomajtía da míac amo quipalaje inminyolo pampa quinchihuaje innojen.

Pablo quinmilía len yahui quichía quiman ajsi, cuaquín quinchichahua

13 Quiman niajsis ca amhuanten, yes ye paxaluilisli nihualac ca amhuanten. Len yes hual cayas latexpahuili pan se, monequi pa ome o ye quijtusi pampa neli quimatilo pampa in se quipía laijlaculisli. ²Inon niquinmilía yehuanten hual quichihuaje laijlaculisli: Quiman nihuala oc sejpa, amo nía nimotzacuilía pa como niquinmacas ojli. Niquinmilic yehuanten huan moxtin in oc sequin, huan niquinmilía axan mas que ayamo niunca nepa. Jan yoje niquinmilic quiman nicataya ca amhuanten in ome paxaluilisli hual annimitzpaxaluilic. ³Yoje nicayas, pampa anquinequi anquimati quinami neli lajtúa Cristo pan nopampa. Yihual quinextilía míac chicahualisli quiman anmijchihuilijtica len. Huan monextía ichicahualisli hué noje capa amhuanten pa anmitzmacas ojli sinda anquichía len yes hual amo cuali. ⁴In momati, pampa mas que

cataya lapiluli Cristo pan in cuahuil nestataya quinami se hual amo quiptaya chicahualisli pa moquixtis pin imiquilisli, ma yoje axan yuli pan ipampa ichicahualisli Dios. Huan unca jan yoje ca tehuanten. Amo ticpialo tochicahualisli toyaxca. Ticpialo ichicahualisli pampa ticate se ca yihual. Ma yoje, quiman antimijchihuilijticate quinami unca toyaxca pampa ticpialo lahuelilitilisli, tiyulisli ca yihual pan ipampa Dios ichicahualisli pa antimitzpalehuisli.

⁵Ximonextilican neli sejse ca anmoxtin pa anquimatis da anyultica quinami monequi pa yulisi yehuanten hual neli quilalilo inminlaneltoocalisli ca Cristo. Mochi sejse ma quita pa yihual iyolo pa quimatis neli pampa unca se ca Dios ilacames. ¿Amo anquijnamiquía inon quinami Jesucristo yuli lajtic anmoxtin sejse? Ma yoje, sinda amo anquilalic anmolaneltoocalisli ca Cristo, amo huil anlanextilisli pampa unca lajtic pa anmoyolo. ⁶Nicchixtica pa amhuanten anquitas pampa tehuanten antimitznextilic cuali quinami neli ticpialo Jesucristo lajtic toyolo tehuanten. ⁷Huan ticlajlanilo Dios pa como anquichías len amo cuali. Amo ticlajlanilo inon pa yoje lacames quimatis pampa neli Cristo yuli lajtic pa tehuanten. Inon ticlajlanilo pa anyulis anquichijtica in hual unca cuali mas que lacames cuajnesi techitasi quinami tehuanten amo neli ticate ilanahuatinijmes Cristo. Huan cuajnesi techitasi quinami tehuanten amo tilanextilije cuali pampa ticpialo Cristo lajtic toyolo tehuanten. Amo monotza len sinda san nesis pampa tehuanten amo tilanextilije cuali pampa unca pa toyolo. Ma yoje, monotza míac pa amhuanten anquichías len quinequi Dios. ⁸Inon niquijtúa pampa amo huil nicchía nindeno pa niquintzacuilis

Dios ilacames sinda yulticate quinami quijtúa ilajtol melahuac. Amo huil nicchihuaya mas que cuajnesi nicnequisquiaya nicchá inon pa annimitzmachiltis quinami nicpía in ilahueliltilisli se ilanahuatini Cristo. San huil nicchá inon sinda ilacames amo yulticate quinami quijtúa Dios ilajtol. ⁹Pampa inon ticpialo paquilisli quiman amo ticpialo chicahualisli huan amhuanten anunca ca chicahualisli. Ticnequilo tiquijtulo, ticpialo paquilisli sinda amo ticpialo pa tictequipanultisi tolahueliltilisli pa antimitzajuasi chicahuac. Quema, ticpialo paquilisli quiman anquipía chicahualisli pa anyulis quinami Dios quinequi. Inon hual ticlajlanilo Dios unca pa anmochías niman cuali quinami yihual quinequi. ¹⁰Pampa inon annimitzjicuiliulijtica innojen lajtomes mas que amo niunca ca amhuanten, pa yoje pan in tonali hual nihualas, amo nicpías pa nicayas cualanquil ca amhuanten quiman nictequipanus in lahueliltilisli hual nechmacac in Tata. In lahueliltilisli unca pa annimitzpaléhuis pa anquineltoacas niman cuali. Amo

nechmacac lahueliltilisli pa annimitzquixtilis anmochicahualisli pa camo huil anyulis quinami yihual quinequi. ¹¹Axan, nechcahuilía san inon pa annimijchicahuas, nocnán. Ximotolinican pa anmonextilis quinami monequi pa yulisi ilacames Dios. Xiyén chicahuac pa anmoyolo quinami annimitzyantía, xilajnamiquican quinami se san ca oc sequin, huan xiyulican ca mosehuilisli pa mochi anmoyolo. Huan Dios hual lalasojla huan quinlalilis mosehuilisli pa lacames inminyolo, yihual cayas ca amhuanten. ¹²Ximopialtican se ca oc sequin ca in tenamiquilisli quinami jan Dios ilacames quichihualo.

¹³Anmitzpialtilo moxtin tocnán nican hual quipialo inminlaneltoacalisli lalalili ca Dios.

¹⁴Ma caya ca amhuanten in cuali hual san toTata Jesucristo huil tejchihuilía huan ma caya ca amhuanten ilasojlalisli Dios. Huan ma caya ca amhuanten in Espíritu Santo hual techmachiltía pampa timoxtin ticate se san ca Dios. Unca pampa timoxtin ticpialo pa toyolo in Espíritu Santo. Yoje ma ye.